

四庫全書

集部

欽定四庫全書

集部

西河集卷一百五十七

詳校官編修臣曹城

助教臣常循覆勘

總校官庶吉士臣倉聖脉

校對官主事臣李廷敬

謄錄監生臣吳朝綸

欽定四庫全書

西河集卷一百五十七

翰林院檢討毛奇齡撰

七言古詩

上巳與故人

他鄉既度清明節客裏重逢上巳天  
當此暮春將盡日不知歸國是何年  
可憐修禊蘭亭侶正值流觴洛水邊  
洛城游騎行春晚曲洧晴沙盪日暉  
客子採蘭紆紫珮

女兒贈藥洗紅裙途中製得甄神曲讀與陳王不忍聞

會川吟

君不見會川湍湍東南行千艘萬艫輓漕粟朝光未動  
鉦鼓鳴滎澤既已堙沅河不可量通塞寧有分浩嘆會  
川上會川樓觀雉堞高前臨闌闌穿長壕平欄斜抱濟  
上橋欄邊紫蒂花千朵橋上青絲柳萬條千條萬朵花  
共柳狂客樓頭舉杯酒紛紛車馬爭水流疊疊芻糧過  
丘阜樓中有女貌似花長裙八幅裁朝霞持杯善唱採

蓮弄能使江南客心動大官駕舸舫球樓捲珠箔巾車  
并明駝幪紗映雙目鳴鉦伐鼓上都去滿目川光起烟  
霧更有東西估客豪鈿篋金箱不知數娥娥紅粉最可  
憐朝朝暮暮娼樓邊酒酣襟坐理瑤瑟斜陽散落紅簾  
前令我舉首心茫然君不見東會川

夜飲倪之煌一草亭放歌并示劉二漢中王二

宏昌

十日九過草亭坐一日不過思殺我檐前况復梅花開

啾啾鳥雀啄藥來蠟盤燒燭閉柴闥駙馬巷南街鼓發  
廳鑪着火淹酒紅菜瀝松羹下匙滑蕭蕭風起短袂寒  
醉歌一曲那呵灘屏前積水見星墮暗中孤雁號雲間  
罇浮琥珀燭光度起看梅花繞涼露東邸賓筵恍舊時  
南鄰主第今何處相過莫使相見稀劉生斗酒能忘機  
只憐王子清江去三過草亭人未歸

登天門山望江

晨登天門巔俯瞰大江渚江渚浩浩環石根細激崑花

散成雨品花灼爍當水關秋棠石隙青苔斑盤旋曲磴  
越叢莽峭壁直下波濤間峨嵋山亭倚博望與此東西  
屹相向世人相視稱天門我來已據天門上天門巖窠  
朝日開峨嵋窈窕烟霏迴小鬟十五共追陟前凌縹緲  
超塵埃青天萬里瀉空濶欲上天門躡天關憑將峰頂  
看浮雲不向波間捉明月橫江江館千古愁螭磯牛渚  
思悠悠振衣獨上天門望惟見長江不斷流

白雲樓歌

有叙

游飲禹州州署楊花飛飛望白雲樓為嘆興

白雲樓高接天雕甍玉柱相鉤連上看挾飛鳥漠漠翔  
雲烟下看垂溜懸飛泉憑欄欲數城外山卧聽潁水流  
潺潺郡王夙昔居其間啓禎之際藩府稠郡王十七留  
禹州當時各請建飛樓敕地命名巨細分博聞為最次  
白雲白雲者誰懷慶君仙人樓居饗王孫增峻金碧日  
月昏鈞天之樂歌管翻青娥紫袖抱瑟彈迥若細雨吹  
雲間聽者若寐欲寤難天陰晝晦歡宴促蕩蕩城門烏



啄肉一從流寇亂中州萬瓦千楹總陵谷白雲樓今尚  
存下有斷垣上有軒土中金絲監井邊玉絲琰一絲直  
萬錢萬絲十千貫摧碎棄井邊土蒞石錢滿闕樓植瓦  
作州署重鑿青天入雲住山頭日出揚曙光風裏楊花  
落飛絮使君拾揚花飲我樓外亭通池引曲溜激激樓  
前鳴持觴一望樓頭絮幾欲登樓百感生

贈隴西羅生

金城河北飛黃雲隴西豪士天下聞結交意氣重然諾

令人不數平原君白臚赤鬣騁寒磧却到徐方作賓客  
許汜難同下邳樓羅侯舊有東川宅涼風吹劒水一行  
南遊莫宿陽平娼四維原是雷塘侶只問塘西十八娘  
飲廣陵舊城酒壚同胡五舍人張十四判官醉

後作

黃花開盡朔風起買酒揚州舊城裏沿城數里有狹斜  
十五當壚對梧子溝頭水淺不照衣開元才子旗亭稀  
江南雁歸不識路日暮且來江北飛

攜條兒宿謝墩書感

謝郎東墅春融融春鳩日啼高柳中小蠻朝粧裏花葉  
開箱自揀春衫紅烏衣桁南綠波繞簫鼓盈船度春曉  
不惜聽歌都護哀但道彈箏貴官好過江遊客遊且吟  
草堂無復留山陰小蠻空上江南路欲賦江南傷客心

結交行贈卞生利南

結交亦已遍那知有若卞利南洛陽劉生騎黃驢當此  
匿影不敢前毛甡居都亭鬱鬱抱足眠東鄰有阿侯十

二學得彈箜篌酒徒載酒挾雙枕將買箜篌誘我飲先  
期余下逢金夫踟躕那得石氏珠卞生利南未識面驟  
雨衝泥似銀箭白騾羶蓋油襖褫奪却黃金擲珠串爾  
時在座酒未巡忽攜鴉髻來如神毛牲素矯蹇詎敢當  
此情酒徒相顧喜且驚毛牲辭讓不得成平明相約訪  
卞生乃在南城之南曲巷裏前對市門後臨水水亭深  
深出水底水波浮動嘗有風四顧乃在菰茭中橫欄複  
閣水面通閣中紅袖千芙蓉生平與少年相逢白鼻騮

不意歷此都乃過卞生家君家最易知易知復難忘但  
唱結襪子莫歌團扇郎結襪當結君團扇徒自傷自傷  
仍欲渡江去謝爾要予種桃樹白魚總駕蓮藕船且醉  
城南狹斜路

重集閻園醉宿賦贈劉昌言進士暨始大始恢  
二令君

去年來此園荷根出水枯葉寒今年來此園雨餘又見  
荷珠團此園久別亦可念况復園中主人面春風送我

入洛陽上已清明不相見新禽啼遍蝴蝶飛畫梁乳燕  
捎紅泥蒲葵滿徑草花落執手慰勞還獻欵坐我桃竹  
茵飲我木瓜酒西亭懸葛巾東厨滌梁簋石枰分踞恣  
酬酢樹裏斜陽散幽壑暝霧初開華燭明留我溪南最  
高閣閣邃翳月光燭明照深樹我念主人情流連不能  
去流連高閣月樹涼捲簾欲倒黃金牀主人本是金閨  
客將赴長安曉馳驛有子承明獻賦還同向天衢展飛  
翮我念主人不能去主人好我且還住空園寂靜溥露

華落月幽清滿江路  
園花開盡當復開  
江南歸客猶能來  
夜深相對情無已  
更盡亭前酒一杯

灌湖聞笛

灌湖西路風蕭蕭  
湖心晚來生晚潮  
孤舟回泊連下橋  
橫橋枯柳垂長條  
忽聞橋畔笛聲發  
遠趁風吹乍幽越  
人耳疑聽塞上鴻  
回頭不見關山月  
我今將上黃鶴樓  
烟波渺渺思悠悠  
樊山再啓謝生宴  
蘋溪重汎洪崖舟  
此時一聽桓伊笛  
能起千年江漢愁

秋風來辭寓居吳陵後遷九龍岡作二首

秋風來兮吹客衣  
芙蓉閣邊秋蝶飛  
我行吳陵不得歸  
故園八月荷花稀  
荷花有紅又有綺  
可憐不作游子衣  
秋風吹吹墮流水

秋風來兮吹客裳  
九龍岡邊桂樹香  
我行海陽過江陽  
廣陵八月秋濤揚  
秋濤雨來漲官閣  
可憐不得還故鄉  
日上西陵看潮落

宴秦郵逢故人將歸



膠西廟前見新燕秦郵亭邊折野桃相逢故人解黃綬  
可憐細草抽青袍孟城幾曲假行慢甃社一湖橫小舸  
北來寓客有王謝南皮佳賦推劉曹高館尚縈紅叱撥  
美人正抱紫檀槽飲酣促坐倚酒樹氣合欲行遺寶刀  
白晝翳雲翻碧落春風吹水漲紅濤仲宣避地登樓好  
枚叔為郎去郡高今朝聽歌不盡醉明日看花空自豪

江行感懷

石帆山下秋風起燕子低飛渡江水越客乘舟趁上潮

倒泝江陵幾千里龍江關微下水遲可憐五馬浮汀涯  
江南王氣總銷歇山前幕府空逶迤我將浮江拾蘭葉  
西上峨眉看飛雪夜汎長江無限情獨坐江波望秋月

艷曲

吳姬二十粧正濃橫江甲第葡萄宮鬟垂倭墮鬢雲熏  
天開曼臉新花紅屏前屏後不相見欲顧還憐掩團扇  
翠黛遙分雨後山湘裙低捲風中練金張家世五侯宅  
大者侍中小執戟門左鴛鴦飛未連坐中桃李看成碧

陽春麗日照階記曲幕重簾兩相啓錦瑟斜牽寶篆明  
銀牀背樹銅盤紫夜來明月海底珠江魚尺素天邊書  
五都密意投宋玉茂陵多病懷相如沉沉夜漏發魚鑰  
先遣雙成恣驩謔赤鳳青鸞婉孌殊女師太傅然疑作  
烏啼著曙火蠟黃風吹雨霽愁山陽喟音宛轉屢哀歎  
歡情失據還高唐瑤桂綵服九華帳不是人間是天上  
漢女燒珠減怨思曹王撫枕增惆悵扶桑有木西有枝  
雙鷁到死猶相思竹竿嫋嫋溝頭會挾得錢刀當對誰

集宋中即席贈梁園諸子

夏城西望春雲輕大蒙小蒙花欲生晚來飛雪灑寒兔  
誰著梁園舊時賦茅堂風細酒復香江東才子還遊梁  
故園賓客久寂寞魏生雖老猶康彊東過太丘里曾訪  
練公子公子亦遠遊空看鄧橋水我今將上商丘驛一  
宿侯生著書宅四憶堂前吟未成無數松楸繞南陌當  
年侯氏嬪耆舊更羨忠貞練司寇中原遺跡總草萊況  
復微文落人後菁花被地蘼葉開座中猶是梁園才茫

茫一望傷心處只有梁王舊雪臺

投寓長橋蘭若聽竺蘭上人彈琴

我行太湖傍不見太湖水長橋蜿蜒如斷虹橫卧青茅  
白茅裏天風騷騷吹客衣我行不住增心悲湖邊蘭若  
種蓮葉中有些師作蓮說香氣吹開一片雲涼陰堆作  
千年雪飄飄攜我入深處湖口相逢宛如素笑彼漁郎  
花底來憐予窮士蘆中去秋庭日落當夜陰竺師為我  
彈鳴琴青天澹澹湖水深秋蹌初作元鶴舞噤噤啞再起

蒼龍吟我聞黃華子秋風生古道客子時一聽日夕傷  
懷抱又聞走馬引躑躅荒山曲草根纏其魂蒺藜傷其  
足豈如竺師之琴悠以閒上有千仞之高山下有萬里  
之波瀾客子聽之心連連竺師為我記其然須知我意  
千重遠只在君彈一掉間

桂樹謠為劉進士謙吉尊人雙壽

射陽湖畔清淮陰團團桂樹環深林大枝駢榦翔綠禽  
小枝千蕊千黃金大枝小枝高雲深高雲熠熠滿庭戶

前列層城後玄圃  
菖葉裁裙拜木公  
桃花蹟面隨王母  
木公垂老髮未皤  
西來王母能高歌  
歲星掩映動瑤闕  
婺光燦爛縈青螺  
雙雙相對驩如何  
君不見劉伶臺下有  
劉子七十高堂共  
甘旨舞袖新披宮  
錦袍稱觴況挹仙  
厨醴人生有子貴  
如此君不見劉家  
桂樹漢代栽淮南  
千載猶花開

集淮陰舊城醉中送白門任金吾北行

鳳凰臺上金吾子  
醉藉寒風卧淮市  
列戟曾扶春殿前

幽居近在秋花裏蕭蕭蘆葦徹夜鳴悲歌一上韓王  
城黃河倒浪赤鯨動青天曳日孤鴻驚茲方卑濕不可  
住欲看燕臺築金去短恰還羈一飯亭長帆竟掛三洲  
路我同衆客解佩刀攜罇共餞青龍橋花宮百八總寂  
靜吳姬十五猶妖嬈我欲勸君酒漫歌折楊柳楊柳垂  
細條霜花著人手霜花撲簌淚滿裾相思常寄加餐書  
竹竿籊籊任公子莫向長安只釣魚

春日同史使君遊潁上過張良洞作



釣州官署曉日紅披衣騎馬遊城東環溪斜度石橋澗  
春風吹入幽嵒中嵒前有花下有水巢父由來此洗耳  
當日張良未報韓側身學道長居此玲瓏破壁啟雙洞  
旁有訾仙抱醢甕洞閉長留碧海雲嵒傾不下丹山鳳  
使君慷慨起開鑿重見幽棲舊丘壑二月良辰天氣新  
士女同來種紅藥我慚巢父對水流使君立志需封留  
鳥啼花發水漠漠山空日靜春悠悠流連襍出酌酒醑  
將共使君返州府女伎能為楚漢吟且向嵒前再歌舞

洛州寒食二首

洛州城東李花白遊子他鄉遇寒食晴絲百丈罨馬蹄  
留滯嵩陽歸不得道傍欲折楊柳枝手把長條三歎息  
洛州寒食柳葉明春衣駟馬城東行遙天風息鳥啼緩  
薰人日暖蟲飛輕女兒欲上鞦韆板愁殺江南孤客情  
於黃申光祿宅豪飲

楚州多賢名首推光祿君譬如鷗在霄矯矯離人羣我  
來楚州甫三日便向甘城訪遺逸叔度能傳外史書頗

川曾進通侯秩罇中酒滿座不空酪漿傾出桃花紅金  
砧緩切鹿頭鯉銀匙細攪熊蹯菰酒酣有佳客清歌理  
蟋蟀呼彼座下人吹笙鼓瑤瑟吹笙鼓瑟揚素歌盤中  
瀉酒如懸河大官庖廚久無餽我愛樽前舊光祿

河隍司馬吟贈王司馬

河隍司馬金閨客家住蘭州大河側入塞驚聞竹箭聲  
沿門盡漾桃花色東流近海瀉入淮鹽溝鐵樹難疏排  
龍隨九晝驗神術魚山屢塞真奇材臨淮千里慶平土

誰識陽平舊明府  
蒨澤帆檣任往來  
江都父老還歌舞  
夫君係屬本右軍  
嘗書白練羊欣裙  
力持鐵帚埽輕霧  
高懸銀榜如浮雲  
生平文酒過五絕  
况復肝腸對冰雪  
廣武城頭發浩歌  
金城關外驅寒賊  
我尋舊友淮水濱  
慕君高誼高嶙峋  
枚臯有里皆佳客  
劉安滿座盡仙人  
曉衙初啟幕烏煖  
淮海相逢在秋晚  
歲宴難聽越客吟  
晨炊又值王孫飯  
秋風瓠子天馬來  
從君一上劉伶臺  
大河積石從天下  
河水東流亦壯哉

楊童子歌

有序

楊進士才瑰童兒九歲文諷俊妙玉膚色持觴隨楊  
君後相驚神也坐語新叶燦燦妙理書嬰面長句與  
之思少時亦自見頭角今就暮落故鄉故人子李焜  
李曜長大蹉跎無復識知近狀見童兒不覺生有羨  
意未請字曰楊童子

楊家童子方九齡錦襠朱帽垂銀鈴清神皦皦濯寒玉  
眸子瞭若秋雲澄當軒偃僂出拜客騏驥銜花鳳梳鬪

滿堂一顧嗟嘆生出席驚看墮雙鳥逡巡行酒有神矩  
屬對吟聯盡好語胸中了悟懸鏡光言下相通似桴鼓  
坐來咽項當酒卮欄邊羣嫗思攜持羊欣未長衛玠小  
何物生此寧馨兒我聞關西楊伯起學術能明號夫子  
數世皆生倜儻人皆與楊童妙堪比又聞揚雄誦綿竹  
有子童烏出塵俗楊童今且勝阿烏况彼非烏總碌碌  
醴泉有根草有本進士楊君擅材分奇文海內爭頌揚  
事親庭下能溫問宮袍初著春宴稀高堂念切曾馳歸

三年重對董鼂策至今侍養藏庭闈楊君孝親宜有  
後嘖嘖楊童豈常邁銜君美酒復羨君不惜長歌為君  
壽楊童子真罕稀手籠金鎖金花枝他年把筆看花發願  
寫毛甡座上詩

西河集卷一百五十七



欽定四庫全書

西河集卷一百五十八

翰林院檢討毛奇齡撰

七言古詩

四

黃浦午日作

海榴花發日正長我游滬瀆逢端陽  
朱絲乍綰艾符小畫舫欲開蒲葉香  
南風吹水水波動簫鼓中流遠相送  
入浦疑投碧玉壺滿盤堆出黃金糴  
連橈並纜宛結筏

驟見戈船遶堤發橫矛舞槊戲艣間紫旆紅旌映天末  
須臾甲士振臂呼盤旋五色蛟龍趨拔幟似將驅海若  
哀歌直欲驚天吳主人徐幹發清興况復風流對仙令  
碧醕頻傾細瓊迴紅船幾處新粧靚當筵絲竹次第陳  
沐蘭剪艾申江春十年未續羈栖命欲繫新繒愁煞人

秋潦接友紀事二首

六月無雨河岸枯七月雨水填居廬牆頭巨樟低接葉  
傍水但穴鳬與魚錢塘潮水漲沙足上潮不共下潮落

君今晚渡當晚潮到門又值風蕭蕭

積水在門月在水主人明燈炤平地僕夫倚壁馬嚙芻  
相逢握手還欵欵楚生遠游橘為頌杜若為衣蕙為縫  
主人酤酒榆作錢出門三借蓮葉船

抱鵑出門行答王兵曹

抱鵑出門苦無力棄鉏欲鉏不得君家南面過百城  
令我時時動顏色前年就君觀秘書秋霖十日仍空虛  
茅山未許抽金篋柿簾安能寫石渠交交桑扈本食肉

有時食粟人不覺謂我嘗甘藿菜香此事從頭總教錯  
君今譽我非尋常敢方李杜高文章山前曉幙秋風起  
那得寒釭焰影長

題周昉畫楊妃調笙幃子

宣州長史筆有神貌花工貌丹州春風神妖矯絕凡近  
徐熙崔白非等倫開元天子重傾國曾把名花比殊色  
清平三調倚玉笙一唱沉香舊亭北太真仙去上皇老  
此事千年等枯槁御苑秋風落紫槐曲江春殿生青草

悠悠蓬島相見稀  
名花再顧無光輝  
宣州妙筆寫一捻  
花樹籠蔥映雙頰  
恍若錦幔中晴風  
繞蝴蝶下坐妃子  
嬌似春花間紅露  
寫朱唇頭上金鶯  
釵腰邊霞綺裙手  
持玉笙思紛紜便  
將釵腳子挑入玉  
笙裏炙簧塗蠟曲  
有方竹管銅匙細  
堪理不審寧王笛  
裏聲與此參差又  
何似三月三日洛  
水邊我尋紅藥游  
晴川凌波遺珮香  
難續姚黃魏紫空  
嫣然誰展此圖向  
我前名花傾國重  
新鮮花繁映瑤席  
障此蓬萊仙比之  
號與秦合坐爭嬾

妍只愁調笙度遲日花萼樓頭呼不出我欲重吟供奉  
詩興慶昭陽總相失崇禎待詔陳老蓮妙筆徃徃傳人  
間安得倩掃吳溪烟頓使宣州三絕筆寫作浣浦雙流  
泉與之重對開元年

題吳趨唐解頭畫贈四明周廣文山水幃子

灌莽日霾迷晴雲共洄涵山亭故幽遐惻惻人上慄吳  
趨解頭唐六如寫來贈作雙瓊琚四明無數佳山水恍  
見東窻幾洞書

畫竹歌

有叙

崇禎中陳二待詔洪綬為沈嗣範畫鉤勒白竹題云  
萬厯乙未法華山貌竹數種在無用老人卷李長蘅  
見之嘆曰小淨名醉墨矣後為權要得去關中人張  
道民脫白驪馬易之是畫一種耳西河毛甡觀畫采  
隱堂咨嗟為歌

昔時蕭悅協律郎曾畫白竹稱擅場豈如崇禎陳待詔  
別為沈郎寫佳妙分叢疊葉竹莖坼粉漉青縱鉤畫

宛如塗隸手底枯橫挂霜毫作飛白翩躚逸落勢宛轉  
玉櫛銀鈿素紗軟淇女粧成一笑寒湘妃雨後雙眉淺  
當時記得住初地偶借生綃寫幽意拾去人誰等法王  
年來自晒供豪吏關中張生頗俠烈八尺霜蹄易寒鐵  
風梢勁鬚相估當正與斯圖鮮差別驂騑既死健筆亡  
迂兒蓮子盡摧藏活禽生卉暫相見青天碧色回花房  
勸君展圖絳庭戶白鳳雛褫掣毛羽駿馬黃金何處尋  
滿林蕭蕭聽秋雨



鞦韆辭

東園紅繩百尺長  
花竿繡版懸畫牆  
春風鶯語吹綠楊  
桃花飛映花竿傍  
阿侯家本邯鄲倡  
紅裙八幅裙帶颺  
扶裙理鬢顧鮑郎  
倩郎催上鞦韆場  
東園有女藏曲房  
拋絲擲帶盤繡牀  
時當寒食呈新粧  
曾來旋舞雙鴛鴦  
于今相對羞頰頰  
自憐不如繩上娘  
初翻曲桁孤鳳翔  
旋迴巾旒胭脂香  
驚看欲墜低復揚  
桃花滿竿飛夕陽

又鞦韆辭

北來小妓善懸綆春風翻花弄花影南人長裙掃堦除  
依稀學得亦不如少時曾看鞦韆戲紅繩百尺遠垂地  
此時正值桃花開畫版斜懸擲繩妓驚鴻舞燕花桁明  
盤絙飛旆蛛絲輕園牆觀看頓成市一時傾動蕭山城  
十年兵革固陵口寂寂東園散花柳紅繩畫版不復存  
此妓城南作人偶春深三月猶坐家脚能踏地手續麻  
草青日出各不見翩翩吹落紅桃花

與朱山人飲

山人好飲耶溪濱布袍角巾隨隱淪有時入山採苓朮  
手持櫻朮披荆榛方春邂逅廣寧路云返姚江百官渡  
踏翻紅藥欹晚霞傾盡青囊瀉朝露耶溪溪水流復  
流紫花初落丹花抽何時製得長房酒還飲龍山最上  
頭

送駱復旦明府補任崇仁

橫秋官閣江日紅三巖散瀑生微風飄飄僊令挾黃綬  
還乘彩鷁臨川中臨川山前曉衙啟橘樹蕉衣蔽堦祀

雲滿樂巴太守亭人來謝客諸王史關中曾食華水魚  
丈夫四十專城居長輿扶杖久將起浮雲蒼蠅愁當車  
黃金馬頭珠匝直上天門撞雙闕合浦仍還海上螺  
巴亭又掛山頭月義烏詞賦矜久傳黃門花樹猶新妍  
揮絃夜坐琴高石種玉春耕蕭氏田朋樽祖輟下江潯  
相望相思似秋浦他日人傳逸少書盡是臨川墨池雨

和張公子花驪嘆

并序

全張公子飲康氏園芍藥蔽晦半萎藉地花驪跼足

避紅行遇塞紅乃長鳴不前客有嘆者

張公子騎花驪踏花長向花下過張家園裏舊有花今  
來且醉康少家青黃被地總難識中有媽紅好顏色洛  
陽方春明溱洧已渙渙芍藥家家開紅白互相眩白花  
穠穠散千蝶紅葢輝輝映雙頰一夜東風起上林彷彿  
霜宵墮丹葉康園邀客開錦卮落花繞路生紅衣客來  
迸作香車泥車塵撲撲飛馬蹄花驪入門獨遙顧不走  
花前落花路筋力雖瘦成嬌好視行步步來嘗惜萎羅

綺恍度扶風馬嵬里土中鞏結香未零石上連環碎難  
理初看散蓋不忍踈繼見堆紅罷躑躅誰將獵獵快燒  
珠頓使深深見埋玉哀鳴駐隴上有似王伯興茅山一  
嘆息千載生躊躇更如衛洗馬愁心著江樹視此春芒  
芒流連不能去客作仰天嘆我為踣地歌踣地休踣紅  
我欲騎花騾騎花騾休踣紅可憐紅落汙泥中汙泥落  
紅亦無幾願騎花騾醉花裏

淮上逢施少叅閨章自京邑還任抒意

朔風吹雨短袂寒都亭遊子加晨餐皇華使官苦乘傳  
前驅羸馬來長安飛蓬索索墮遙梗此地相逢最堪省  
韓信城頭白雁飛淮王宅畔銀牀冷蕭條古驛絮語親  
薄游同是隆冬人百篇詩句驗予拙十年宦跡愁君貧  
臨江分守界西楚閣皂山高望來苦何意天涯對酒卮  
前事今情又重數君行當及休役車我留淮水還躊躇  
追陪不忍暫相失晝談竟及宵燈餘重尋湖口渡湖櫂  
烟水蒼茫遙明滅祇愁南去見梅花驛使將歸遇冰雪

廬山翠律倒水青相期還發清江舠莫言知己重逢處  
只在淮陰一飯亭

喜逢南安趙司馬開雍入京率贈

去年渡馬湖便欲登君堂蹉跎入秋節流浪過海陽今  
來本欲下橫浦為訪湖西阻秋雨不見芙蓉渡口船空  
搖白鷺洲邊櫓拒霜花發紅滿城洲前白鷺爭飛鳴涼  
天清霽日初出忽聞司馬重還京贛江浩浩向東瀉馳  
驛相逢贛灘下我為湖海老逋人君是江州舊司馬天



涯嘗苦相見稀相逢各道長相思丈夫忼慨爲知己此  
地逢君感何已梅花涼未開春鶯又將語承明定留君  
爲君酌斗醕匆匆斗醕恨未揭萬里王程更前發綵纜  
高牽賴水寒相望秋山見新月

人日途中登高作

去年人日馬上過今年人日浮江波沙頭草色又如此  
故園柳條今若何嵯峨江閣蔽江口強起登高飲春酒  
獻歲才看七日還離家已是三年久江城送客綵燕新

家家門戶沙頭春誰裁百福銀花勝還贈三年未返人

古意

木波城北霜霏微玉狼山下烏欲啼黃榆蔽關落平渡  
白月夜上高平西高平少年騁游騎仰視雲中雁來至  
迴身却射榆影中忽睹刀環暗流涕刀環鹿速東隴頭  
霜清月白雁門秋清霜秋下稷西塞白月夜落城南樓  
城南樓上落寒月拂拭寒砧擣秋節玉杵敲殘雁浦星  
金雞唱盡交河雪交河雁浦何處尋銀欄綉帳夜燈深

燈下紫鍼長嘆息機中織素自沈吟沈吟但坐露華濕  
藁磴琤瓏珮環澁四壁寒螢聽去頻重城哀角吹來急  
去年遠寄到龍沙脈脈黃雲去路賒今來塞雁歸飛早  
應見于闐秋草花

柳花歌寓蕪城作

春風濯濯江南路吹過邗關到瓜步邗關三月春草長  
市樓大道怨春陽陽春初開日杲杲大道花飛一何早  
清明漸近細雨來繞樹游絲墮縹緲游絲縹緲繞如霧

綰入隋堤柳條住隋堤柳色青  
瓏璁嬋嬋流鶯啼不去  
流鶯啼處停玉鑣依依拂面盡  
長條揮鞭既度紅欄曲  
驅車還上綠楊橋紅欄綠柳心  
斷絕隋苑隋堤有離別  
新聲三疊何處吟弱線千條倩  
誰折可憐草青及春暮  
可憐綠柳低還仆青樓曳翠縈  
酒壚白馬連錢繫歸渡  
低枝毵毵接長坂高枝蓬蓬白  
花滿茫茫飛雪繞去遲  
冉冉輕綿罥來晚翩隨晚蝶罥  
朱花緩向春烟拂玉鴉  
幾時飄颻落西苑幾時流蕩去  
南家南家西苑兩相棄

流蕩飄飄日顚顚春風吹去不上天春燕銜將復垂地  
初翻積雨障輕塵更度粧樓裊素茵滿眼離披不知處  
愁殺東西行路人

小補陀畫幃子歌

并序

紹興城東二十里許曹山陶氏放生池凌子天翰將  
更名此山小補陀報母養佛令楊明府作畫幃子董  
孝廉為歌謂姓曰翰母禱于佛母而生翰翰痛母之  
亡故擬報慰云耳

君不見曹山巖業東郭東中有巨礪開琳宮澄潭千尺  
插橫嶂潭水澈淬潛魚龍巉巖兩楹架巨石石蓋倒水  
空玲瓏踰波入石石四啟小舟蕩漾穿當中相傳神禹  
舊開鑿手遣巨靈剷碧落斷黿剝臂拄水心焚象抽牙  
倚崑角風傾雨削如有神清鐘梵磬交冬春天花散綺  
布松壑好鳥說法通雲津會稽凌翰探幽渺記得前身  
竺僮小慈王抱送稱善才仙姆留馨似阿保淒然思報  
顧復情青山碧水空冥冥滄洲萬里巨波濶靈伽一片

蒼烟平漬淪海藏拔平陸欲翳此山議修築祇苑恒河  
到處名何必蓮花坐暘谷君不見宜興楊挺生丹青妙  
絕無等倫又不見常州董元愷落筆超然起物外一爲  
圖繪一作歌披圖當奈清歌何越州萬壑千巖裏不信  
城東有補陀

遊西施山園亭將歸題壁

西施山館倚東郭曾住西施教歌樂複閣還留翡翠香  
前池自洗胭脂薄我來醉酒正陽春大琴小笙壓上津

春寒日暮欲歸去一樹桃花思殺人

上浙撫軍東巡詩

元精鍾嶽瀆勲望聯台堦分符專外閫授律尊中臺雙  
旌白日映六纛青雲開雙旌六纛連天起白日青雲繞  
江沚虞廷九牧咨上公唐世諸藩建長子藩屏牧馭捍  
衛良司麾正值東南強斗牛區野拱神服吳越都會躔  
輿疆春潮初發固陵渡二月東巡啟戎輅錦纜新開龍  
鳳城飛梁自駕黿鼉路金牙翠羽並沙轉將指滄溟闢



廣遠樓船下瀨揚漢軍  
弩石連山運秦輦蛟門蕩蕩海  
上開從行願賦東蓬萊  
桃花飛作春前水自有金鼇渡  
海來

錢生行

黃槐花落堆路隅錢生醉借東城居  
翰林主人曾問字  
朝餐還饋金盤魚涼風團團逐雲走  
白馬紅軒蔽高柳  
秋霄健鶻思入雲撇眼摩挲薊門口  
薊門萬里薄塞城  
此中那得留錢生王侯邸第將軍幕  
虛裁折簡相逢迎

大兒秉槎上天闕小弟裝金使南粵祇留屠狗抱關人  
燕市悲歌看明月春山西馳不可待金馬門前歲星在  
玉女空簪驚頂花蒼龍枉耨麟洲菜綸衣膩恰抱史書  
欲行無翼難追趨鴻飛冥冥附天末弋人纂纂將何如  
昔慚柳季漫相許今愧錢生更超舉兒童攔路牽錦袍  
賓客當車致綺語持杯挈榼送遠程翻然竟逐錢生行  
秋風淅淅秋雲散江水東流空復情

錦筵桃花歌為周公子玉忠初度

桃花初發清江春朱門又值懸弧辰汝南公子瑤島客  
長與桃花比顏色庭前春酒一百盃麻姑買向餘杭來  
泠泠如玉白如水願汎桃花獻公子持之欲飲泪滿巾  
武陵香靄誰問津當時露井懸月輪為求勾漏辭侍從  
蕭然高寄四十年綵衣又復桃花鮮年年三月春風發  
看折桃花上錦筵

壽邗上王夫人

邗江激激連淮浦有母賢名播江許弋雁晨炊隴上星

九熊夜坐燈前雨年來八十齒轉高稱觴舞綵皆賢豪  
西河游子懷芳節猶望揚州廿四橋

湘湖採蓴歌

鴨烏山前春欲暮阿子前湖採蓴去藕根菱葉生蒲湖  
艇子灣灣不知處畫竿十尺挑碧絲香蓴宛轉生華滋  
山前山後人難遇採得盈筐欲寄誰

單廣文初度

先生手挹仙盤露早向南山拂烟霧篋底新藏柳絮書

人間爭誦張衡賦絳紗深處自傳經久有安車詣伏生  
堂下啣魚曾卜象庭前綵鳳舊知名今來喜共香山飲  
通德門高到來詔不信樽前奏綵衣試看天邊散雲錦  
李日耀日焜同解省試有感

生平自恃鸞鳳姿不與凡鳥同宿棲所交老成皆特達  
少年不敢爭雄雌有友名高被謠詠曾徙塞外二子遺  
早驚夙慧肯委贄敢云左挈而右携一朝顧盼刷毛羽  
摩天拂日同時飛自憐老大困車轍兼之良友羈邊陲

轉因二子驟發跡拭眼不覺雙泪垂上林飛飛有歸雁  
春來繫帛嘗相追他年扈從陪羽獵萬一得傳使者辭

赤毛行贈姜之琦公車

赤毛生神鷄磔磔稱豪鷹騏驎產渥洼削耳杉竹成會  
稽才子姜武孫揮毫灑墨如翻盆進賢八代好家世垂  
老未入承明門生兒晞髮甫就試便向金臺獻名氏內  
苑轟傳奇木文章堂羞教侯芭字古來傑物生有因樞  
邊老馬真英神

壽王將軍

高牙百尺橫江啟，獨坐中權繡幢裏。  
劇孟肝腸熱似雲，嫖姚風骨清如水。  
龍韜虎略轉戰開，男兒三十真雄才。  
春江千頃桃花浪，瀉作軍前酒一杯。

青省吟為祁中丞德配商夫人壽

爛柯山前楓葉黃，西來青雀銜玄霜。  
翩翩神女雕錦裳，長懸玉珮寒花香。  
上堂拜母曰母彊，提壺願進青瑤漿。  
元英之始十月良，明颺暄日當春陽。  
黃金為罍玉作觴。

維予亦得瞻  
蕊芳伊昔司憲抒紀綱夫人每預緘青箱  
靈修浩蕩還帝閭碧霞遽授刀圭方夫人偃蹇稱未亡  
從容勉子為范滂况曾幼侍太傅堂喜吟柳絮因風颺  
只今顧婦盈閨房金箱玉篋分象牀東方日出照杏梁  
少者挾瑟中理粧從來三婦成豔章其中鮑妹尤非常  
寒花燦燦錦帙張滿堂應製天孫襄微文乏彩慚飛鳳  
願同青雀低相羊

西河集卷一百五十八



欽定四庫全書

集部

西河集卷一百

五十九  
六十一

詳校官編修<sub>臣</sub>曹城

助教<sub>臣</sub>常循覆勘

總校官庶吉士<sub>臣</sub>倉聖脉

校對官編修<sub>臣</sub>沈清藻

謄錄監生<sub>臣</sub>劉書

欽定四庫全書

西河集卷一百五十九

翰林院檢討毛奇齡撰

七言古詩

五

樂府新歌

漢家伊洛本京畿  
梁王樓閣擅閨闈  
大道雕甍十二翼  
曲房繡幔幾重圍  
日出紅櫳疑鏡照  
雨飄翠網似絲飛  
蘭牕玉女爭妖豔  
雕鞍公子鬪輕肥  
北里笙歌新宛轉

南隣桃李舊芳菲何悟流雲能作黛判將新葉看成衣  
鳥鳴私弄昭華琯花影重移帝女機碧波欲漲眉痕淺  
斑竹初生泪點稀游童挾彈從教騁蠶妾移筐始畏饑  
才子五侯中第返使君千騎上頭歸不信羅衣半夜燬  
詎知華轂詰朝違疇能結帶非雙縷若箇沉缸無九微  
團扇障聲猶障面長琴連軫亦連薇生兒年少為盧婦  
上客吟多是楚妃拋繩舊事隨春電覓釧殘粧及晚暉  
莫向屏前怨日出自有花間歌露晞

宋憲使雪中飲席

越王城頭白雪墮宋公臺下朱旗翻毛姓抱刺走滑滑  
開轅交榮謁者煩宋公望見倒屣出後閣重開雪如織  
瑤裾珠履填滿堂共見毛姓動顏色沈沈官舍止且留  
恍疑身在蓬瀛洲梁園賓客重嚴馬鄴宮飲讌來應劉  
當杯卓犖論今古睥睨如虹氣如雨天人要妙多可陳  
輓近紛綸少相許青箱縹軸萬餘疊世本從頭細標揭  
韋相能傳楚傳詩楊公自授關西碣清譚滿座酒滿壘

當前誰是乘時才嘆生五際大文作歌成四壁悲風來  
自憐置身苦不早世事浮雲總繚繞未識南樓詠裏情  
徒傷北寺車中草逡巡欲退轉蹶躅何幸相依邁前哲  
剡川早有戴安居南郡將留仲宣轍君不見宋公暫止  
會稽署將赴臨安臬臺去第五難遲浙上車寇君不借  
江東路寒風相對飲醇酒朝發山陰暮湖口東西相望  
去住難一聽清歌一回首君不見平臺飛雪賓客多毛  
姓對酒呼如何

維揚贈姜侍御圖南巡鹽并祝初度有詩

長淮浩浩出桐栢上引江流下邳澤揚徐舊地斥鹵遙  
炙素熬波海濤圻當年齊相計利開吳王者煮海雄齊臺  
木華作賦無遺句桓氏成書有軼才蘭臺侍御掌文史  
更作巡方繡衣使巋然霜陞二三人治此鹽官幾千里  
高冠柱後平準書豸頭豹尾懸商車烏衣監部識門第  
白簡彈人工走趨此方懷舊得遺烈漢代張綱棄車轍  
君今攬轡頗有餘况復從游盡英傑良辰游讌載美酒

長向隋堤看楊柳自笑毛甡淪落人乘興還能廁奔走  
蕪城草黃時苦寒城邊游子衣裳單多君理財日無已  
天下未有如財難東西繹絡征戍繁可憐轉粟江淮間  
書生開口理民用不登要路言亦頑男兒有才須早立  
姜君侍御方四十

須邪行

有序

里中貴君金書幃子來生却之於其塊情

須邪復須邪巷裏生諠譁瓦礫撇撇墮烏鴉近前問何

人云是來生行歸家寒風西北來吹出衣中紗入門何  
所有石甌浮魚蝦門內何所見不見蟲蠹鳥毳與蝌蚪  
但見滿壁綰結成秋蛇東隣有好女本是邯鄲媧練裙  
八幅不刺花願生為書之生乃對此長咨嗟西隣有賈  
人日暮載一車美酒百甕黍千斛為我大書雲錦如朝  
霞我乃前致辭願君勿為呀君不見鹿幘堆左壁飛蓬  
索索垂髣髴又不見鹿鞞堆右壁着履踏地脈紋斜鳴  
呼須邪復須邪



將渡江贈日者過訪

道人過我青谿堂  
荷花滿池白日長  
我知凡事皆有命  
君能縱譚我能聽  
十年躍馬志未成  
今來重向清江行  
君歸若遇秋風起  
莫問江東張步兵

陳黃門台孫病中招飲賦贈

兩年兩至淮陰城  
敝衣懷刺羞襦衡  
幾回欲問元龍狀  
百尺樓高那能上  
今年我從中州來  
清江未渡猶徘徊  
元龍豪氣果無敵  
況是文章老宗伯  
我來此地不一逢

枉作梁王倦游客平明挾帚到門遠正值陳公病偃蹇  
門生扶病籃舁前深恨從前見來晚青蘭繞屋芝滿堂  
金壺玉碗傾寒漿座中羽客傲五嶽庭前佳子超諸王  
斜陽冉冉拂高木細雨牕紗度紅燭擲塵揮栢總樂方  
挾矢張弓坐追逐夫君今作臺諫臣當時曾宰春江濱  
春江江郭跨東越萬里迴潮瀉飛雪每到三秋水落時  
一望西陵最愁絕西陵游子去復來逢君又是榴花開  
病中記得觀濤處愧少枚乘七發才

宿山寺書壁

小溪淅淅覆草裏大溪瀲灩長松間高崑雨聲落松葉  
一夜冷徹桐君山山中寂歷忘近遠再宿始知路深淺  
南朝寺僻春到遲我來四月猶花飛

黃姑取妻詞四章

有序

毛姓已渡江與友飲馬洲城東村村人兒贅前村家  
女置婚儀議離處數年至是年七月六日適合姓見  
此戲為作此詞有生倫比似者稍稍諷解

黃姑取妻美爪指日倚天河織文理取妻操作理固然  
傷心只在天河水河流秋清白如雪爪指簇簇心腸絕  
人間小女較優劣嘗恐乞巧坐成拙

黃姑取妻多綺緡黃姑兩髀赤見骨牽牛入市賣不成  
歸坐營室泪如刺當時被驅河水邊祇少二萬青銅錢  
取妻無儀不得前從來天上亦使錢

黃姑取妻妻嘗在東夫在西妻立機上晝夜啼黃姑飯  
牛牛不肥七月七日河滿隄呼車渡河汨汨泥河深無

梁艇子遲着履拂面坐低帷  
簌簌隔河聞牛齒天帝有  
命夜渡之城頭烏鵲爭枝棲  
銜唇結羽造履梯露零襪  
泣烏背歛誰知天河今渡來

黃姑取妻賣黃牯七月七日洗頭雨  
雨乾水枯黃牯乳  
黃姑取妻共一處黃姑上堂拜阿姥

試茶歌

東吳種茶白石株建州數處皆不如  
漸西漸東總甘辣  
會稽日鑄天下無春雷殷殷雨花薄  
瓜蘆小頭暗生肉

風吹枝亞甲折長鵲唇鶯嘴捎雲涼我來試茶值社後  
少婦入雲綠洗手山頭爛石膏沐多雪礫霜崖絕枯朽  
青絲籠子翦香葉箬裏焙成卷銀鬣不需木檠共桑砧  
何用銅匙并鐵鉢相攜且試耶水濱青黃黑白甘苦辛  
粗柑細藥似難較雞蘇狗棘非其倫須臾地鑪活火起  
沸向花堦石蘿裏半杓疑分乳窟泉滿船剛載南泠水  
傾來清瑩作冰雪掃却黃瓷細漚沫分明眼底見幽蘭  
驟使胸中斷消渴昨年曾向顧渚回一槍試後棠梨開

宣州瑞草襍紫笋蒙山石花猶綠苔會稽新茶真莫並  
搗腹頓教肺腸靜亭前風落增永搖山頭日色皆清冷  
今朝歸去踏葛蘿明朝飢渴知如何喉焦舌燥且勿苦  
聽我開口歌茶歌

逢姜九飲

昔年遇爾春城東山前十里桃花紅今年逢君值春雨  
幾樹桐花落寒塢壚頭汗漫傾酒卮與君曾賦春游詞  
夏王陵東南鎮西紅粧灼灼如朝曦朝行採花暮歸遲

綠楊鶯語春晝迷可憐春晝鶯語澁君欲行春待春及  
君來能宿酤酒家爲我且醉山桐花

桐江王生長身幹一丈餘二尺遇于城東里有

長句

君不見伍胥挺然一丈身猶能挾弓報楚人又不見王  
商八尺坐未央單于仰視皆徬徨君今一丈乃有餘獨  
行道路垂衣裾丈夫困窮亦時有東方瑰奇挾兩肘日  
棲金馬索升斗不如侏儒飽食且醉酒毛甡自視負七



尺仰頭看人乞衣食有時春至戀春色顏然將老終可  
惜我今願君東到蓬萊山山頭日上花端爛挾予兩翮  
同追攀又不然驅車仗劍出天外坐予車下吸沆瀣與  
君俯仰且有在焉能偃僂還曲鉤依時逐例爭封侯食  
糠食肉兩不休

山居庄家女種蓮子許粒小鉢歷日五鉢隱然  
有鉢底忽花鴨啞去惜哉作蓮子

蓮子有心能作花女兒採蓮先採蓮分蓮擘花得蓮子

欲問所遺隔花市若耶溪頭千葉蓮風吹蓮葉葉田田  
年年上已自抽葉不用栽根理雙檝盆頭有水照衣履  
長洗釵魚作風雨投將蓮子裏燕泥囑子泥中發辛苦  
團團小鏡貼波出隱見荷根起抽立風前捲鬢粧不成  
雨下拋珠佩來澀當堦花鴨睡花穩竊入凋欄覓新茵  
不念紅衣晚歲稀竟使朱顏早時損耶溪五月芟葉涼  
畫船兩漿艤橫塘女兒只向東隣坐不採蓮花心自傷

鐮麥詞

鎌麥鎌麥斷簪束刺來子歸家初夏四月早起著犢頭  
看田左右皆陸穉獨我滿田盡羊角暮歸著接羅看屋  
左右皆剥積獨我滿屋盡羊蹠三春風雨亦嘗有力田  
卒歲難逢時壠頭小鳥日呼叫架架格格曾何資來子  
告我當鎌麥恐歸如我鎌麥詞君不見前村老翁收麥  
斛一甌兩匙貯筐簾官車粟陸爭載趨尚揭空筐覆車  
軸君不見少婦今朝鎌麥歸明日下田食瓜薑

湟川詞贈別

趙王城邊百粵臺  
湟川渺渺連州開  
羨君南上湟川渡  
五月驅車嶺頭路  
繁花滿縣襍荔枝  
迎君勿訝君行遲  
今年竹布裁五褲  
明年椒穗垂兩岐  
紅亭酒香日炎午  
五兩薰風動南浦  
他日貽君陸賈書  
莫向人間道新語

長歌送顏泰颺北征

黃雀巡檐游不及  
蒼鷹飛神虬  
雖天矯不若駿馬馳  
丈夫慷慨負奇骨  
左顧流沙右溟渤  
手持寸筵撞重關  
足下浮雲蓋高闕  
當年定交三市東  
綠巾碧髮雙顏紅  
輸

心對面指山嶽仰天噓氣垂霓虹力持壇坫十年久獨  
捧銅槃殺雞狗飛蓋爭馳鄴下才揮毫共集梁園友倦  
游曾著亡是篇世人拾得驚相傳珍臺珠樹散霞綵青  
霄白鳳翔雲烟馳驅河洛結瑤珮徘徊宛委搜瓊編縱  
飲那知有時代同舟便足稱神仙橫行萬里渺難顧奪  
得宮袍展雲路卞玉誰教暗裏投邢顏却被宮中妬子  
房豪氣不可除一椎誤中秦王車舉頭大笑跋衣履清  
江細浪開芙蕖倉黃萬里帝京道挾冊長安待明詔幾

疊黃金臺上雲一羣冀北風中蹕丈夫相對意氣真飛揚跋扈皆殊倫晴郊一送顏光祿思殺鏤金錯彩人

送姜二承烈之都門

丈夫居家不遂意翻然拔劍游帝京滹沱萬里白雪盡薊門千頃黃榆生輕車揭揭走析下燕市風雲起叱咤懸金時上九成臺挾冊當來五侯駕我從君行被君轍讀君雄文嘆竒絕向使馮唐早濟時魏邴蕭曹豈堪說春風吹開楊柳枝同舟元禮神仙姿會乘虎觀青雲去

莫忘龍山夜雨時

訥齋詩題史四廷栢南園新居

訥齋先生好園居前庭一池長種魚垂幔或臨右軍墨  
滿牀盡疊張華書廬蝸車蠅苦未展更闢南園重修翦  
泥水空纏鄴下垣丘樊自衛山中饒當堦紅藥映虛牖  
桂樹團團拂清晝徑外爭看求仲來墻東誰是君公後  
君今弟子喜更彊公超成市非虛揚絳紗前後鬱相望  
悠然綠竹彈深堂堂中顧盼總芬潔別榜一軒名煮雪

童子飢然土銜寒裘安醉抱冰壺裂南山敝廬空自憐  
陸居非屋水非船難尋西瀼浣花去僅留北幹松風前  
從君願續小園賦兼賦園中桂之樹他日能同汗漫游  
應記南園讀書處

看月書事

有序

七月十五夜中元偕吳二卿禎飲商太宰宅樓酒酣望  
月去廣寧橋顧見龍華寺說法事鬼食漂燈流燎幡幢  
鉞鐸男女鱗脊如畫便相走觀卿禎躅足顧予曰子才



士需立賦所見務其覈實使人省得知勿以虛叶何如  
倣元白長跼歌使商命說徵說各記憶書于篇

七月十五天氣涼酒酣浴罷單衫長出門連臂看月去  
同到廣寧橋下路廣寧橋上坐萬人項背軋札如魚鱗  
廣寧橋下水波淺大船小船波上轉船中所有更奇絕  
云是中元鬼時節明燈灼灼浮水來萬盞千甌乍明滅  
初疑火樹蔽江渚旋道流螢墮秋雨橫波落石飛彩星  
極浦銜珠散龍女旌幢高引紙蓋揚旋風吹蓋陰燐翔

吹螺擊鉦撞法鼓迎照當年淨飯王飯王大坐正設食  
盆供盂蘭有名色龍華作法甘露殊細灑楊枝散涓滴  
橋邊婦女坐相待各守亡人紙牌在女為爺母婦為夫  
焰食從教滌清瀝呦呦壯女向天哭少婦羞人隱牌宿  
苦無紈扇障燈紅幸有珠簾裏頭綠吳生顧此發長嘆  
謂我長才屈柔翰相逢若此賦不成空復從前惜良旦  
我歌數句月自來終歌此曲纖雲開廣寧橋上人無數  
忽聽歌聲首盡回

雨中聽三絃子適女士王玉映將之吳下過宿  
蕭城西河里因作長句書感却示

汝不聞三絃聲最悲啁啾嘶軋誰所為天心雨落風逆  
裂坐客一時雙泪垂三絃初開彷彿鼓萬厯年來重張  
甫曹剛不作甫不傳何處新聲到江潯當前撥拉如訴  
說淙淙嘈嘈漸相接絃聲復襍風雨聲拍散音繁語鳴  
咽江東女士當代希會稽王氏留烏衣著書不讓漢時  
史織素自憐機上詩清暉閣中父書在絲筆長濡舊螺

黛吟成紅雨滴口脂行得青藤繞裙帶風流遺世姿獨  
殊將從秦氏聽啼鳥朝行賣珠暮無粟天寒袖薄涼肌  
膚可憐兵草滿衢路欲望西陵過江去崎嶇宛轉進退  
難祇恐行來且多誤昨宵行李深巷宿聞汝空奩脫車  
軸今朝寂歷風雨來令我停絃撫心曲梧宮木落愁復  
愁女墳湖畔今難留君行渺欲向何所長江浩浩還東  
流蛾眉掩抑自今古況復哀彈最淒楚今朝自雨昨自  
晴不盡三絃此中苦從來出處難復難願君絃絕勿再

彈

半面將軍歌贈陳左府

半面將軍年四十南戰羊城北馬邑歸來十載青門前  
可憐立功尚少年當時投筆出關去萬里鳴沙暗雲霧  
弭節曾留都護邊連營不倚將軍樹乘秋代馬向風發  
烽火蕭關動京闕判將陷陣入邊雲誰道張弓效關月  
長驅汗血仗蜚弧撒却腰間金僕姑論功較戰課先後  
不讓唐李那讓吳十年埋劍在田野欲向蠻天洗花馬

嶺樹叢叢蔽眼來  
瀧川浩浩當胸瀉  
樓船南下共楊僕  
射獵重教起軍曲  
從燔礮火燎顛毛  
不拊珠禪泣髀肉  
焦頭滅耳志未成  
獨留半面哀人情  
誰憐射柳亭邊住  
竟使垂楊肘後生

汝陰蕭大行將赴闕東渡過訪抒筆贈別

君不見中年丈人本負芻與君並坐羶糲  
綸又不見郢人至鼻頗未潔相對揮斤嘆  
奇絕丈夫有才貴知己伯樂鹽車兩依倚  
何況蕭君司馬之鑑且無比鸞鳳集門

亦可喜吾聞蕭君奉使持節南海頭還鄉彤馬將淹留  
忽當繩纓菅屨呼啾啾迄今負土已成室漢相三年將  
就職我讀愁吟尚慘悽况復哀號在疇昔君家忠孝真  
莫當趨庭又有烏衣郎相隨千里學詩禮在道一時稱  
驕驕與之偕上謝安閣洞口薔薇正花落急返平臺拜  
紫泥勿教同舍占烏鵲陽春三月風雨多離亭樽酒應  
高歌胥江渺渺烟波裏欲別蕭郎奈爾何

書意贈西昌蕭伯升白鷺洲高樓

北風吹雪下江郭白鷺洲長暗寥廓蕭郎開幕燃桂枝  
重飲洲頭最高閣江天飛雪千古情蕭郎意氣踰平生  
清飈遙洗蜀江峽流雲欲撼西昌城連朝高會來鷺渚  
爭躡湖西講堂履我登傑閣望江河君向空亭考鐘鼓  
荒洲相接千百人東西十郡雙江濱寒能予衣飢予食  
悠然歌詠忘昏晨丈夫誰不重意氣揮斥千金偶然事  
獨成良會向千秋那羨平原與無忌春浮園頭枯草香  
雙江雪霽開春陽奉常舊有好花竹至今人說平泉莊



期君更作春浮醉誰道雙江雪路長

集曲水即事

青山百屏向南郭積翠橫開曲池曲高樓一望秦山陽  
流雲斷續梅雨涼夜來布錦錯燈火列坐庭深對歌舞  
行童十二唱柘枝招搖背袖低參差酒酣徹幙燭垂地  
薌澤微聞墮環細主人潦倒脫絳幘尚引清樽照容色  
交盡海內為名高相逢不醉徒自豪驪駒在門車在路  
看殺庭前石榴樹

送任雲蛟公車

九月芙蓉蔽江渚孝廉船載江頭雨金樽相把潮欲來  
一曲離歌醉南浦公車十載憐計偕懷書屢上昭王臺  
旗亭雪煖紫貂墮薊門酒醒黃雲開春官新制改書義  
漢帝臨軒策竒秘郤氏中林選一枝平津東閣推高第  
長安春轉花又紅玉駟鞭落驚游龍秋江潮上金魚美  
盡在任公一釣中

金鑑冰壺吟為張推官作

金鑑挂高闕百里無近光冰壺貯前庭徹底成清霜龍  
山嵯峨起東府別構蓮堂建鐘鼓金鑑朝懸紫嶠曦冰  
壺夜滴清江雨冰壺金鑑絕世清臯陶淑問稱明刑外  
臺分節下神讞朱花綠雀搖空廳張衡機密棄文網張  
釋寬平析民枉從來張姓本連天何必張星在天上君  
不見張公金鏡獻宸聽高鑒千秋著為令餘光并照寒  
士廬伏櫪長鳴解馳騁又不見庭前綆綆朱絲繩銀牀  
百尺絕寒冰花井乳相映發一時誰與同廉凌持壺

壽公公飲冰

讀荔裳集安雅堂集感賦

當今作者誰擅場山東趙王與萊陽王公士楨趙進美  
妙與萊陽正相峙崇禎以還大雅絕遠溯嘉隆紹前哲  
總是山東李白豪能使人間歌白雪今來三子起方駕  
不數風流舊厯下幾回東岱互稱雄一出中原便成霸  
黃河九曲到海難東臨碣石流漫漫天垂百折亂雲霧  
風吹萬里迴波瀾丹崖山前日初曉真見蓬萊接瑤島

漢武看成朱雁來秦王渡處丹龍繞君文初著名荔裳  
集成安雅斯為堂大文既布錦貝息黃鐘在御瓦缶涼  
瑯琊天水渺難即惟見延清好顏色到既忻從御史游  
王筠故受昭明識每惜今人事工巧大雅當前罕分曉  
但道江郎襍擬工誰言謝客新聲好往讀衍波詞輒思  
王禮部長憲與大叅鬱若兩珠樹可憐同體異工曲白  
玉分沙桂分木從教鳳羽蔽天涯寧止鷹揚距河朔于  
今大雅煩若林鍾嶸三品空沉吟東看無數滄溟水一

望蒼茫何處尋

別王恒

蟋蟀方在堂條忽歲云暮窮冬雪霏霏游子戒歸路東  
亭酒煖草葉稀臨行欲換征人衣城南王恒負意氣慷  
慨向予歌式微躊躇上馬不能別韓信臺前看飛雪

將歸贈丘四象隨

昔飲江南伯通里便記淮陰有丘子我今轉作淮上吟  
贈君愧乏雙南金淮河蕩蕩淮水濁丘子風流絕凡俗

一見應教勝郭生再觀何必推羊叔逢來三四是子淵  
傾樽暢飲黃花前道傍不數假王鈞城頭空覓甘羅錢  
涼風蕭槭度秋暮條見寒冰滿江路芳草萋萋春又生  
愁殺王孫欲歸去君家兄弟真不羣元方曾侍金華君  
在堂循吏未白髮中閨金母搖青裙最憐丘子本孝弟  
欲渡廬江見毛義問寢嘗踰世子篇敬兄不辨鄉人至  
况曾仗節急朋友一死一生見要久白馬南馳范巨車  
災雞遠酌橋玄酒吁嗟友道不復持東行杵臼將依誰

見君不忍辭君去我欲從君那得知

毛甡將行張公子初禕贈甡踏冰行率筆酬之  
我行淮陰非得已不共王孫釣秋水乞食潛行射澤間  
避人還向珠湖裏曲江才子好我奇謂我落拓誠相宜  
中秋高讌并重九人前往往稱予詩飛光如流歲如驚  
淥酒黃花等閒度火樹長留烟水寒美人竟下蕪城路  
嚴風朔雪旅食涼倦游客子思還鄉躊躇不忍遽分手  
君還贈我哀歌長窮冬孤客易生感况復哀歌更繾綣



一曲秦青雁鶩飛數聲羌笛關山遠嗟君家世本曲江  
趨庭得侍尚書郎茂先有叔總博學蒼梧無弟非文章  
君才獨絕鮮儔侶淮海相逢驟相許曾來夢裏過江淹  
頓使花前憶儂父贈我長歌真有神恍若寒宵對君語  
對君語感君情此曲名作踏冰行層冰皓皓環江城踏  
冰我欲冰中度忼慨徘徊百思生

西河集卷一百五十九

欽定四庫全書

西河集卷一百六十

翰林院檢討毛奇齡撰

七言古詩

六

題畫

薰風乍起午夢長  
石榴花發薔薇香  
枝頭好鳥最宛轉  
啼破一聲枕簟涼  
誰持并剪剪江水  
繪出青黃與紅紫  
醉卧閒亭日墜時  
幾度含毫思無已

奉和葉掌院夫子亭下雜花原韻

先生有亭最爽塏倚檻如坐春風中況當三月艷陽發  
夸條蔓枝匝地紅綵繚不用金錯翦鞞鞞豈與凡葩同  
始知大匠貴自得巧者不若拙者工有時薄醉坐花下  
門紗旒裂遜馬融豈徒紛紛隔堦覩宛若女樂填廂櫳  
裊衣發藻光愈燦搖砌擢秀神所鍾寧題丹棘作野客  
不使翠羽稱殊翁論化羞比漆園蝶吐飯偶集蒲盧蜂  
情閒有觸便生興道大于物何不容長安花少客無賴

時塲藝圃真難逢但留階祀一顧盼煌扈安辨澹與穠  
子房門下多薦達當時尚有東園公

和理柵杙歌

并序

卓妣閩中僮徽之曾與之渡湖思不可得王雙白言  
見在金陵儀鳳門能寄之徽之起製歌令王歌授名  
曰理柵杙因而屬和言卓妣當理焉

只在石頭城下住莫過長干小橋去但恐年年細草生  
不識青溪舊時路桐花綏綏夜雨多三春又盡花如何

可憐同在置果側猶自城頭理柩杙

雙珠篇

有叙

穎川隣宣公晚喪子哭之哀然曾用佛蓮花經一套  
供楣間至是還經牲以內家過慰並為文祈之迨再  
過公祿一兒攜一兒出拜曰君記之乎舉此六齡矣  
誰家老蚌生雙珠大秦明月皆不如圓泉璧水產有殊  
老翁垂白多根株前年恍逐隋侯趨今年又入鮫女廬  
小珠焜燿照里閭大珠灼灼盤中居暮年有子稱商瞿

我翁得此豈晚乎畢逋共哺頭白烏龍門百尺孫枝扶  
老人得子草得苓况復老健彊肌膚漢家禱嗣張玉弧  
靈池百子宮臺孤採蓮西海蓮未枯蓮花今且開東湖  
雨餘花底珠淒淒

羅三行

有叙

羅三百駢杭州教歌頭有稱名甲午集紹興東昌坊  
羅三率變童十六人按歌酒酣執酒起為壽慷慨言  
曰羅三非優人盍贈我長句歌使人知羅三苦沉淪

也姓唯唯乙未復集紹興九曲里祁兵憲第諸伎畢  
奏羅三復引聲乃悲懷激揚顧笙笛絃索均失執歌  
竟為言寧得憶贈句乎姓時頗失意聞其言感動驟  
起援筆丐兵憲展絹憶唐元和白居易與元稹作霓  
裳譜歌惟恐湮失歌句中且藏譜數猶可按切影響  
今亦畧溯緣要便可尋按故益多曼吟耳

周秦以後古歌絕漢代延年尚能說逡巡魏晉中再亡  
杜夔左驥徒倡狂開元神武興法曲高頭教坊譜相續

華原驃國襍甘涼立部聲喧坐歌促金元起創鬯舞辭  
因之變伎歌參差九宮分譜限南北一十九韵音調微  
明興一代本無樂鼓吹鐃歌苦交錯優伶鬯弄習轉深  
南曲浸繁北浸落相傳南曲始吳下梧苑風流宛如乍  
吳儂創調絜古歌翻出新聲美無價當年絕唱稱崑山  
松常折噤浙齒頑張芸朱美魏亮父至今嗣續猶艱難  
杭州羅三重意氣誓欲尋原奪高第攝聰絕慧通鬼神  
一雪從來品題異依聲按律節奏奇宮商相接復相離



涵融便捷鶯語澁急決噉嘹鶴鳴遲聲沿板定寸為拒  
韵七字三前與後新生故死黍粒分迫度緩稽肌理轉  
一聲將發坐客定數變將終動神性流離遷客涕洟傾  
窈窕新娘怨思迸搗箏摘阮徒自豪吹師失管絃工逃  
吳中譚如并張燕到此不敢爭鳴號東昌坊頭合歌板  
首坐毛甡泣何滿哀吟失職貧士情那問終趨共前緩  
羅三歌罷拉瑤瑟手把金卮揖甡出自言不是尋常人  
耻作當年李協律生平好酒名酒徒結交滿座皆屠酤

上之不屈古王者其下詎嫌今大夫千金散盡獨長嘯  
故作歌吟襍啼噪變童十萬蒲伏前不足當予日調笑  
毛公落筆能有神悲能寫哭怒寫嗔貌予令予使不朽  
至今予作忘言人昔年聽歌及寒食桃花滿樹風前折  
歌來倏忽又一年今夕聽歌是何夕今歌既驪且復苦  
坐者停聲立停舞寒蟬數弄咽柳條孤雁一聲墮江浦  
洞庭秋風剛葉下去春在晝今在夜霜繁露白月欲明  
竹斷絃弛鼓初罷宛如花底摘生葉少婦綵絲自成節

嚴鋼鏤處銀鏐涼冰甕開時水晶裂又如石齒決金薤  
剗核吹蘆擘風籟屏高燭短坐嘆愁昔日梨園近何在  
蹉跎相失淹歲月非我能忘棄前說我亦沉淪年又年  
顛顛相看總離別東昌坊裏九曲園高車駟馬填前軒  
聽歌滿堂勿相問此中惟見毛甡冤毛甡沉淪本無極  
那復羅三又失職羅三當復歌此歌莫道聲繁歌不得

憇螺川胡推官虞胄過訪因贈

策杖登嵩高遙望天中山羽翼不得前薄暮空來還南

行入匡廬逝將上衡嶽浮舟渡螺川遂憩川上閣螺川  
濯濯古司猷山木清秋曉行縣云是天中馳檄來知我  
窮愁且來見天中岿岿產異人振衣獨對清江濱宛如  
嵩高上登日鬱然相望真嶙峋嶙峋萬仞動寒色玉井  
冰花映天白不向空廳列鼎書長懸孤榻留行客我曾  
讀君文嘆君似長卿金門獻賦後當入承明庭今來江  
上作司理讞獄如君復有幾伯始從教博似雲胡威只  
是清如水越人久作汗漫游橫江又見紅螺浮清秋一

飲郇公酒醉看朝霞江上樓

題秋山讀書圖送舊京鄒山人還紫微兼詢沈

耕崑徵君

晨星漠漠東陽路斜傍雙溪晚來渡耕崑何在高復高  
云是秋山讀書處秋山巖壑跨紫微相看同著青荷衣  
王孫遠道怨遲暮春草欲生歸不歸

題抱甕丈人濯足圖為顧有孝徵君

君不見彭城畫工有奇技姜肱擁被終咨嗟又不見華

陽高士善圖書籠頭齷齪空隨車美君孤處笠澤中世  
人誰得窺君容儼如岌岌千丈深巖松置之茅屋長蓬  
茸吳山之長水之冽浩浩溪流白如雪潔薄高隨萬里  
風沿洄皎帶千山月君來抱甕畜畦水日傍清泠思無  
已新蒲早薤紛渺瀰碧芊青蔣覆溶漚躊躇落日猶傍  
徨頽然濯足清溪傍觸埼激石共奔迫浩歌睥睨投滄  
浪瀟瀟隱見溪流長

醉歌行同周司理令樹飲于廬陵作

贛江冽冽吹朔風  
司刑官艦沙棠紅  
廬陵古署倚江郭  
漉酒夜傾花樹中  
中原才子薊城傑  
佩劍爭看截鏐鐵  
草屨牛衣共繡茵  
銅槃獸火飛寒雪  
司刑自言苦志乖  
江高不道能重來  
秋鷹脫臂朱電削  
神鯨掣浪青天開  
聞言坐客醉起舞  
我亦哀歌勝梁父  
統統城頭夜漏長  
起視明星落如雨

謫胡東崑被竊詩

并序

甲辰首夏胡子東崑從郡歸夫何暴客者伏隱東崑

之室竊貲以奔西河毛姓聞而笑之曰東嵒有十盜  
而無四封向氏探其前而司厲不得揭其後東嵒殆  
困哉雖然銀船雖化鐵公尚存篋篋久罄何曾予壁  
間之兒杼袖其空不能贈梁上之子幸青氍之未亡  
何赭衣之可問所懼者未揭篋而滕已絕甫穿牖而  
垣已頽竊裝者祇覆其書懷壁者但看其古似茲寔  
士之形將來主人之憎于是慰其薄失而謔以放言  
東嵒先生家四壁夜有何人壁間匿杼緯機絲總是空



餅麻罌菽悲無色從來肱篋羞擔囊野廬賓客徒相翔  
但將國士虛無意說與河東王彥方

雨夜斷橋聞笛聲和丁起曹

楊花飛飛落江渚蘇小墳前夜來雨平船兩槳何處尋  
東風吹落楊花深前湖水滿欲歸去草暗裙腰濕花絮  
斷橋西上繫錦舫何處一聲徹雲路初疑江徼吹胡笳  
旋聽索索箏琵琶野塘無復折楊柳春山自有落梅花  
呶啞水面斷還接反覆分明訴天末龍吟潭底水淺清

鶴唳寒灘雨鳴咽紅樓高對十二重夢回三峽流淙淙  
隴頭萬里碧天外武陵一曲清宵中我聞桓伊夜吹笛  
愁煞清溪赴都客扶風夜聽洛下吟尚在乎陽里中宅  
杭州千頃西水頭新聲吹出伊涼州樓船簫鼓日無盡  
長笛一聲愁不愁

贈商繪

商生太宰之幼孫風流卓犖隨諸昆珊瑚寶缺映明月  
龍蔥佳氣開朝暉永恩樓高百餘尺旦暮登臨藉遺澤

玉樹還榮謝傅庭朱衣自統韋公宅生裁二十意惘然  
蹉跎深悔終軍年手持一編已了了心中萬事空懸懸  
自言少孤遭荼苦鷄乳低飛罹網罟析理難教兄子知  
無才不爲家公數輜輶冠蓋耻追逐日對遺書冀能讀  
池上需爲彩鳳吟燈前私啓青箱哭我之從游商雨臣  
王孫矯矯其兄倫慚予不盡柳下學多君猶慕相如人  
從來琥珀謝腐草惟爾中情最堅好縱使成連到海難  
却憐侯氏求玄早君家兄弟定無敵良友爲龍驤爲匹

荀文未獲侍諸宗商子終當棄三術丈夫有志百事能  
少年何用哀無成高樓百尺且長嘯會看萬里風雲生

留別劉琯兄弟

昭華兄弟雄楚州一時藉藉稱諸劉論文偉麗過鮑謝  
興酣意氣凌王侯西陵游人看秋柳邂逅逢君大淮口  
拂塵高聽真長譚剗剗直飲公榮酒層冰落落解棹歸  
嚴飈吹折黃綿衣他時若問江南信只看春鴻向北飛  
別戴大金黃大世貴

淮陰城南有飛雁游子窮冬返鄉縣雪滿孤舟戀戴逵  
波連千頃思黃憲寒風截截霜滿裾臨行出入還躊躇  
傾樽不盡此時語開槭頻訂他年書淮流一曲下江潁  
渺渺長帆去西楚何處思君最愴神三月江南棟花雨

送沈九嗣範同姜啟赴都

紉綺游上京翩翩盛裘馬丈夫貴立名飾志取相下懷  
珠恐迷時抱匱以待賈所念在得朋唱高和靡寡徐樂  
論甲兵歐陽策風雅歐陽受詩章句成上書欲共嚴徐

行漢京力學五十士惟此乃得當賢名抵掌不為辨士  
策拂毛直作驚人鳴三街九市五衢道列轡聯車並騁  
裏時向尚書省裏行誰來丞相門前掃我本羈遲子美  
君似飛鳥橫雲一去幾千尺送汝將行動顏色江館留  
題夜火紅揚州去路春衫白桃花初開柳葉新春江細  
草波粼粼作歌當飲餞欲別還逡巡到京若問嚴生薦  
勿道行歌朱買臣

古歌訓  
贛南嚴撫軍過訪

挺之抱偉畧武也多高懷悠然滄浪興却遇子陵來子陵汗漫走荒谷越女灘頭種山麓衣懸貢堊春繭絲目斷湘南舊叢竹手把長竿坐鬱孤城頭啞啞聽啼鳥

仲秋既望得蕭行人嗣奇計適向陽將歸過別  
各投汨哭以長句并寄孝子荃以使者行促  
援筆煩亂無所次序

八月既望白日微坐客向陽將遠歸為言夜夢頗凶惡  
故人信音傍烏鵲荆門剥啄野花墜忽傳合肥計書至

行人蕭君六月死有子哀號數行字白日上客在前  
分明絹素疑雲烟星軺曾餞廣陵驛迴颿寧返浮槎川  
詢之四月乃還棹五月居廬病難療太君先赴白玉樓  
痛殺王戎死親孝天乎蕭君君果亡行人更作修文郎  
顧榮璧軫已推絕庾公玉樹真埋藏生平有心感知已  
邂逅曾逢故都市鳴驢動地幾失聲化鶴沖天恨無翅  
遺書數篋過孔融嘗嗟君賦秋風中桓譚自能惜遺軼  
平原何用憂窮通但道棘人漫哀毀扶杖觀棋鎮爾爾



我欲貽詩寄慰言使者旋行不移晷中心煩亂寫無句  
頃刻封將泪如注欲晰當年知己心更問將歸向陽去

党太守挽詞

薤上露一何晞城頭望烏欲飛烏飛不飛叫將曙月落  
城西白楊樹不見車驅鎮海臺但見旌搖汜橋路汜橋  
西去江水清翦錢懷送何為情

舒城黃母胡太君輓歌辭

有序

夫謳來斥苦莊生引紼之章歌在輓留漢史吹簫之

節則辭銘未盡藉以申哀碑碣難忘用彰遺德無他母  
儀已極顯融史誦必開幽竊也黃母者龍舒黃畏菴先生  
之母平子先生之大母也閱閱攸傳本嫻家訓英華所  
鍾餘及閨則故謝家柳絮詠之庭前姬氏葛覃習諸壺  
內不惟扶風之誠旦晚堪型抑且德曜之光後先難紀  
宜乎經貽子而有丸熊之風硯與孫而具戴鰲之慶矣  
乃當先生出宰西陵憶太母咸來湘水潘郎西去共傳  
板輿御母之文曹氏東征猶有農野安民之句雖萊蕪

介吏貧自生魚奈潯陽哲幃力能封鮓以故人之稱之者可  
謂使衆以慈而已之推本之必曰伊予有母無如月蝕中  
閨星流古署玉棺降于鄴下白帽裂之南徐陶侃自亡  
母潯陽二客欲冲天安石未還山江左遺民如喪妣故  
既禮奪苴麻節哀邵國權移金革屈職山濤然而靈旗搖  
曳于江令之祠丹綵牽援于許公之宅龍門雖遠芻前  
奠酒多人馬鬣未加石上留題有字返舒江而會葬  
發哀者定多武昌名士之車渡浙水而停綏留殯者豈

無杜曲驚人之調况乎洛陽賈誼久著膝前江夏黃  
童竝推孫子歌鹿鳴而嗣服騁龍駒于再傳是則百  
藥因大母命名文若以小孫起譽猶且心摧洗馬不  
育于母而育于劉腹痛元卿不慈于親而慈于祖四  
齡哺育口授毛詩十載艱難躬先顏訓彼撫琴長慟  
本多罔極之思乃負柳將歸又有陳情之請則仁人  
孝子安少蔡邕罔愧之辭曉蓋晨輜可乏袁子難行  
之唱哉因作哀歌各成長句

塗車且勿行芻馬且勿追勸君搖大鈴聽我歌輓詞君  
不見尸鄉從人惜朝露白日嬾娑郭東路又不見潯陽  
處士怨空水湛湛春觴夜浮綠人生修短安足知芳名  
要在能留貽不見舒城黃母今還歸轎帷縹緲江之涯  
江東士女咸哀思不減伊吾執紼為歌詞問母何以竟  
得之母之扶桐倚車者曰蕭之父母躬導親輿蒞茲土  
墨綬垂來掛綠涼清泉煮就遺羹苦方春山縣花滿堂  
後庭有母來稱觴冰魚自貯雕盤獻綵鳳還銜紫誥翔

雕盤獻饌接晨暮綵鳳飛來倏飛去人云東海亡所師  
我亦西州哭何怙冢孫平子對我說四歲慈幃舍呱啞  
情苦難教李密陳心慈早為元卿竭流離十載兵革間  
旅茅斷舶荒烟寒毛詩口授甫了讀蜀帽手縫猶未安  
我思太君初太息更復聞言重唧唧賢哉有母長若茲  
萬載千秋似一日君不見將歸召父不可求一時臺使  
爭相留又不見膝前孝廉最憔悴不作陳情亦流洎

為商生贈吳太保詩

鑑湖八月秋水融金塘十里青芙蓉越中遺老盡耆俊  
其中尤健推吳公吳公少小射猛虎羽獵曾經負疆弩  
奪得翹關第一人望重燕城數千戶金書鐵券累代傳  
中朝司馬前名賢紹衣兩世公再振鉤陳羽衛相盤旋  
東宮出傳長宴見至尊復召南薰殿晚食嘗餐祗帳糜  
朝陽親賜雕輪扇予之內舅公難兄同官先作金吾公  
公之難弟懸豹尾侍御南臺掌文史鳴珂舊里三榮列  
相見還留半牀笏悠然故國山澤肥共返金塘看新月

沉沉甲第繞鑑湖  
花間畫戟垂朱弧  
酒酣耳熱尚拊髀  
青天白眼誰吾徒  
生平負氣喜壯節  
每嘆袁絲少奇烈  
信陵何處訪夷門  
越石終教解縲紲  
公家世緒長聯綿  
獨難志節永皦皦  
秋霄健翮爭攀騫  
君不見芙蓉八月  
鼓蘭棹七十吳公  
似年少

古薊門行


少年結束從邊游  
腰懸寶帶金吳鉤  
新隨彊弩出懷衛  
躍馬欲行雙泪流  
青天銀鵲渡榆水  
昨日羽書來薊丘



烽烟四起塞垣動朔風一夜關城秋燕兵索戰破紫嶺  
漢將近前踰白溝此去定追朱鬣馬臨行不換黑貂裘  
但隨彊弩後何日大刀頭

羽檄起疆場神兵下朔方誰言無所恃大將出中堂驅  
車揚風沙拔劍銷欃槍北經月支窟西抵樓煩王薄暮  
宿南亭朝行過東光戰陣踰驃騎軍營作護羗寒風效  
矢急白日同沙黃殺氣薄寒鐵敵運猶枯楊可憐流蕩  
三城戍復有招來六郡良突騎不收司馬節擒生羞逐

羽林郎採花判結于闐女醉舞新成石國裝但教塞外  
春風發那道城南秋夜長



西河集卷一百六十